



FACTVM,

Pour les Habitans des Faux-Fossez Paroisse Sainct Nicolas de la ville de Troyes, intimez & appellans de la Sentence renduë par les Esleus de Troyes le 9. Decembre 1650.



Contre *Iean Fessart & Edme Brissonnet*, appellans de la mesme Sentence, & intimez.



ES Habitans de la Communauté des Faux-Fossez avec les autres Communautéz au nombre de neuf, composées de plus de douze cens familles des faux-bourgs de Troyes, dependantes des Paroisses de ladite ville, ont esté traduits au Conseil d'Estat par Ionas de Bellefleur Adjudicataire du Droit de quarante sols, imposé par les Maire & Escheuins sur châque muid de vin entrant en ladite Ville, pour en jouyr pendant six ans, commençans le premier Octobre 1639. jusques à pareil jour 1645. où ils ont esté condamnez au payement dudit Droit par deux Arrests contradictoires des 23. Decembre 1640. & 12. Avril 1642. ansquels ils ont esté obligez de satisfaire pendant tout le cours dudit bail.

Il n'y a eu que lesdits Fessart & Brissonnet, qui sont deux particuliers Habitans de la Communauté des Faux-Fossez, l'une desdits neuf Communautéz : lesquels par vne opiniastrerie & pour leur interest particulier (parce qu'ils possèdent beaucoup de vignes) se sont opposez en l'Eslection de Troyes à l'execution faite de leurs vins pour le payement dudit Droit : & comme leur opposition estoit déplorée, pour la fortifier de quelque appuy, ils mandierent l'interuention, non de toutes lesdites Communautéz sous le nom & la bourse commune desquelles on auoit soustenu l'exemption de ce Droit jusques ausdits Arrests, mais seulement des Habitans de la Communauté des Faux-Fossez, qui est la moindre de toutes, n'estant composée que de 80. Habitans.

Et quoy qu'il n'y eust pas beaucoup de fraiz à faire en ladite Eslection, neantmoins comme lesdits Habitans ne prestoient leur interuention qu'à regret ; ils la restraignirent par leur pouuoir du 10. Nouembre 1642. dans ces trois limitations : Que lesdits Fessard & Brissonnet leur communiqueroient les poursuites : qu'ils ne feroient que jusques à Sentence definitive en ladite Eslection, & des fraiz desquels ils ne pourroient pretendre remboursement que contre toutes les Communautéz.

Comme leur interest particulier, sans raison valable contre lesdits deux Arrests, estoit le seul mouuement qui les faisoit plaider, ils furent deboutez de leur opposition par Sentence de ladite Eslection du 18. May 1643, & condamnez aux despens.

Leur passion de plaider estoit si grande, qu' auparauant ladite Sentence, sçauoir le 14. dudit mois de May, dans vne juste défiance de réussir contre des Arrests si solempnels ; Ils dresserent vn second pouuoir sous seing priué,

sous le nom de toutes lesdites neuf Communautés, pour poursuivre la cause par appel en cette Cour ou au Conseil : des fraiz de laquelle ils seroient remboursez & creus à leur simple serment.

Après auoir fait tous leurs efforts pour faire assembler toutes lesdites Communautés afin d'arrester ledit pouuoir (ainsi qu'il s'est tousiours practiqué) lors qu'il a esté question d'entreprendre la poursuite de quelque affaire commune à toutes lesdites Communautés, comme il se void par la production desdits Habitans des Faux-Fossez, en cause principale sous la cotte F.

Lesquelles Communautés ne se voulurent pas engager à vn procez de telle conséquence, tant parce que l'issuë ne leur en pouuoit estre que desaduantageuse apres lesdits Arrests, que parce qu'il n'y restoit plus que deux ans dudit bail, expirant au premier Octobre 1645.

La passion neantmoins qu'ils auoient de plaider pour leur interest particulier aux despens desdites Communautés, leur inspira de faire signer leur escrit par certains particuliers desdites Communautés, sans assemblée; A l'effet dequoy ils commencerent par celle des Faux-Fossez, qu'ils firent signer par dix-huit des plus simples les vns apres les autres, en diuers lieux, mesmes dans les tatiernes, sous vn faux donné à entendre que leurs autres Cohabitans au nombre de quatre-vingts, & les Habitans des autres Communautés au nombre de plus de douze cens en feroient de mesme.

Leur artifice n'en ayant peu tirer dauantage, & ce pretendu pouuoir leur estant demeuré imparfait & nul, ils ont neantmoins par vne continuation de leur auenglement & interest particulier interjetté appel de ladite Sentence du 18. May 1643. sur lequel ils ont fait inthimer ledit de Bellefleur, contre lequel ils ont fait quelques poursuites, que lesdits Habitans ont desaduoué en cas qu'il fust formé sous leur nom, ainsi qu'ils auoient eu aduis.

Enfin, apres beaucoup de procedures, mesme vn Arrest de l'an 1647. par lequel ils ont esté condamnez à nantir ledit Droiët, ils ont abandonné leurs poursuites contre ledit de Bellefleur.

En suite dequoy ils ont fait assigner lesdits Habitans en ladite Election de Troyes, par exploit du 27. Iuin 1646. pour le remboursement des fraiz par eux faits tant en ladite Election, en vertu du premier pouuoir du 10. Nouéb. 1642. que de ceux faits en la Cour en vertu dudit second pouuoir du 14. May 1643.

Lesdits Habitans ont aussi-tost fait offres, ainsi qu'il se void par leur plaidoyer du 6. Iuillet 1646. qui est la troisieme piece de la production de la premiere cause principale, des fraiz faits en ladite Election jusques à Sentence definitive, en vertu dudit premier pouuoir, & soustenu n'estre tenus de ceux faits en vertu du second pouuoir, comme nul; En ce que dix-huit particuliers Habitans, sans assemblée, practiquez l'un apres l'autre, qui auoient signé vn pouuoir intitulé du nom de toutes lesdites neuf Communautés; n'auoient pu obliger ny ruiner ladite Communauté composée de quatre-vingts Habitans: Ce nombre bien justifié par vn procez verbal fait en Iustice le 14. Avril 1641. les Rolles de la subsistance du 2. Nouembre 1643. qui est le temps desdits pouuoirs, du 20. Septembre 1644. & 28. Nouembre 1645. produits sous la cotte D. de leur production principale.

Sur ces defences l'instance ayant pris traitt, lesdits Habitans ont demandé l'estat des pretentions desdits Freslard & Brissonnet, il auroit ainsi esté or-

donné par deux jugemens des 20. Octobre & 8. Novembre 1646. dont ayans temerairement appellé, & demandé l'éuocation du principal qu'ils auoient instruit, & soustenu que ledit second pouuoir estant obligatoire, ils deuoient estre remboursez des fraiz par eux faits en consequence d'iceluy, à leur simple serment, ils ont esté debourez de ladite éuocation par l'Arrest du 30. Iuillet 1649. & en suite lesd. appointemés confirmez par autre Arrest du 3. Iuin 1650.

Quoy que par ces Arrests ledit second pouuoir ait esté rejetté comme nul, car il n'y auroit eu qu'à donner condamnation sur iceluy, neantmoins en donnant leur estat desdits fraiz pardeuant les Esleus de Troyes, ils y ont couché les fraiz faits en consequence d'iceluy.

Mais reconnoissans la nullité dudit pouuoir, ils ont mis en auant 3. choses, ainsi qu'ils auoient fait au principal, dont ils auoient demandé l'éuocation.

La premiere est vne Missiue à eux escrete à Paris le 29. Decembre 1645. par Edme Massey particulier Habitant de ladite Communauté, de laquelle ils ont induit sans apparence vn adueu de leurs poursuites, quoy que lad. Missiue justifie le contraire: Car outre que ledit Massey n'estoit pas en charge de Syndic, & n'escriuoit pas au nom de la Communauté, qu'un seul particulier n'est pas capable d'obliger: C'est qu'il se void que par vn motif de charité enuers Brissonnet l'un des appellans, qui est son allié, apres leur auoir parlé d'une autre affaire comme personnes qui estoient à Paris: Il leur dit qu'ils ne devroient pas s'engager en cette affaire, dont ils ne doiuent esperer aucun remboursement, & feroient mieux de la quitter pour leur profit: Et il adjouste encore cette raison, que cette affaire ne regarde pas la Communauté, parce que le bail dudit Bellefleur estant expiré dès le premier Octobre precedent, on ne payoit plus rien dudit droit. Ce qui iustifie que ce que lesdits Fessart & Brissonnet en ont fait, dont ils n'ont peu estre diuertis par cette lettre, a esté pour leur interest particulier afin d'auoir main leuée de l'exécution de leur vin sans payer le droit qu'ils ont neantmoins esté condamnez nantir audit de Bellefleur, par ledit Arrest de l'an 1647.

La seconde, qu'ils estoient chargez de vingt-sept exploicts de contraintes, faites contre les particuliers de la Communauté depuis le second pouuoir, qui leur seruoient d'adueu; ce qui est entierement contr'eux, d'autant qu'outre qu'ils se sont chargez desdits exploicts, qu'ils ont tirez par surprise, comme ils ont fait ledit second pouuoir, de quelques particuliers, qui ne peuuent pas sans assemblée engager ladite Communauté: C'est qu'il se void par aucuns desdits exploicts, que ceux auxquels ils estoient faits ont payé ledit droit, les autres en ayans depuis fait de mesme sur les contraintes dudit de Bellefleur: La troisieme, que par le moyen de leurs poursuites depuis & en vertu dudit second pouuoir, la Communauté auoit esté exemptée dudit droit dont elle n'auoit rien payé, & qu'ayant ainsi profité de leurs poursuites, elle leur en deuoit rembourser les fraiz, *quasi in rem versum*.

Ce moyen qui estoit subtil & specieux, aduancé par leur requeste du 12. Aoust 1649. présentée à la Cour afin d'éuocation du principal, leur a esté dénié, & depuis destruit en la seconde cause principale de l'Election, par plusieurs pieces, Sçauoir par l'extraict & declaration de Griueau Receueur dudit droit à la porte de la Ville en datte du 24. Novembre 1650. iustificiant comme il a esté payé pendant les six années dudit bail expirées en Octobre 1645. Co

que lesdits Fessard & Brignonnet ont depuis esté contraints de confesser par affirmation par l'acte du vingt-cinquième dudit mois, après l'auoir neantmoins dénié par le mesme acte, qui est la troisième piece de la production desdits Habitans en cause principale sous la Cotte M. à quoy il faut adjouster la preuve qui resulte desdits 27. exploits de contrainte.

Lesdits Habitans en se defendant de la sorte touchant les despens faits en consequence dudit second pouuoir, ont reiteré leurs offres de ceux faits en ladite Election en vertu du premier pouuoir.

Et se sont incidemment rendus demandeurs afin de condamnation des despens reserues par ledit Arrest du 3. Iuin 1650. & des despens faits depuis leursdites offres contenuës audit plaidoyer du 6. Iuillet 1646.

Surquoy est interuenue la Sentence dont est appel du 9. Decembre 1650. par laquelle lesdits Habitans sont condamnez suiuant leurs offres, aux fraiz faits en vertu du premier pouuoir, qui sont liquidez à quarante liures: & au surplus les parties hors de Cour & de procez sans despens, de laquelle les parties sont respectiuellement appellantes.

Lesdits Fessard & Brissonnet, en ce qu'on ne leur adjuge pas les frais faits en consequence dudit second pouuoir, & qu'on ne leur adjuge que cette somme de quarante liures, quoy que plus que suffisante pour le peu de procedures, l'instance ayant esté terminée & iugée par forclusion sur la seule production dudit de Bellefleur par le President de ladite Election luge subdelegué, sans voyage de la part des appellans, pource qu'ils ne sont separez de la ville, dont ils font partie, que par la contrescarpe, & que mesme ils ne se sont pas defendus, ny leuë ny payé les espices de ladite Sentence, mais ledit de Bellefleur qui en auoit besoin.

Et lesdits Habitans en ce qu'on ne leur adjuge pas les despens reseruez par ledit Arrest du 3. Iuin 1650. & ceux faits depuis, & au prejudice de leurs offres.

Partant esperent lesdits Habitans, qu'il sera dit qu'il a esté bien iugé en ce qui regarde la condamnation de quarante liures au profit desdits Fessard & Brissonnet, & en confirmant ce chef que ladite Sentence dont est appel sortira son effet, iceux Fessard & Brissonnet condamnez aux despens de la cause d'appel. Et en ce qui regarde l'appel desdits Habitans concernant la demande des despens reserues par l'Arrest du 3. Iuin 1650. & de ceux faits depuis leurs offres inserées en leurs defenses du sixiesme Iuillet 1646. sur lequel chef par la mesme Sentence les parties sont mises hors de Cour, il sera dit qu'il a esté mal iugé, & en infirmant, que lesdits Fessard & Brissonnet seront condamnez ausdits despens, & en ceux de la cause d'appel.

Monsieur SANGVIN, Rapporteur.